

**Kempen kutip 1 juta tandatangan bantah saman ekor
Malaysiakini.com
August 23, 2010**

Dewan Pemuda PAS pusat (DPPP) akan melancarkan kempen mengutip satu juta tandatangan untuk membantah saman ekor hari ini.

Pelancaran tersebut akan diadakan di bazar Ramadan Pasar Keramat pada jam 5.30 petang ini.

Ketua Dewan Pemuda PAS, Nasrudin Hassan, yang akan merasmikan pelancaran tersebut, berkata barisan exco DPPP serta ketua Pemuda PAS negeri akan turut hadir.

Pelancaran petang ini akan diikuti dengan kempen mengutip tandatangan pengunjung bazar Ramadan tersebut.

Katanya, DPPP melancarkan kempen tersebut sebagai sokongan kepada usaha naib presiden PAS, Datuk Mahfuz Omar menentang saman ekor.

Ia ekoran kesukaran untuk memperbaharui cukai jalan dan lesen memandu mereka yang telah disenaraihitamkan dalam saman ekor.

Mahfuz yang juga ahli parlimen Pokok Sena adalah pengerusi Jawatankuasa Anti-Saman Ekor (Kase).

Ekoran desakan kuat aktivis dan parti pembangkang, kerajaan telah memutuskan untuk membenarkan mereka yang disenaraihitamkan itu memperbaharui lesen dan cukai jalan tanpa perlu membayar saman ekor sehingga Februari tahun depan.

Bagaimanapun, mereka tidak dikecuali daripada membayar saman ekor tersebut.

Nasrudin berkata, kempen hari ini akan diikuti dengan pelancarannya di peringkat negeri-negeri bagi merealisasikan kutipan 1 juta tandatangan.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/140834>